

Kapiya Sën Jon Kevu Muginsën Vu Kerisi-yi-alam

Ğağek Mala-tumsën-yi

1 ¹Ngaa sënë og yō nedo vu nyëmuğinsën. Lob he hanğo los halë rağ malamin. Gehe hetunğ malamin rağ gehe hebë nemamin rağ meparah. Ngaa sën he nanër ğağek rağ agi, og yik yi mehō sën tu ğağek sën nevong behil nado malad-tumsën lo. ²Lob Mehō mala-tumsën-yi sagi tu mehōnon rağ, betōk yam rangah, behe halë yi. Lob he nanër ğağek yōnon sënë rangah, banër vu ham bē nedo mala-tumsën degwata los degwata ving Ama. Rëk tu mehōnon rağ behe halë yi rağ malamin. ³Ngaa sën he halë los hanğo ggovek lo, sën he nanër rangah vu ham ving, in bē hil nid ga jak hil nabë sën he los Ama luho Nalu Yesu Kerisi nimin negga rağ he agi. ⁴Lob he kevu ğağek sënë yök vu ham in bē hil ahëd nivesa rot gemaggin pin nama.

Hil Ana Jak Rangah

⁵Lob ğağek sën he hanğo banër rangah vu ham lo, yik nebë sënë: Anutu nesepa loğ ngaa rangah-yi mu, gağ ngaa malakenu-yi teka su neggëp vu yi rë. ⁶Bë hil nanër nabë, “Alu Anutu nimin negga rağ he”, rëk mu hil nesepa loğ ngaa malakenu-yi, og hil nehekuung rağ, gağ hil su nesepa loğ ğağek anon rë. ⁷Gağ bë hil medo jak ngaa rangah-yi nabë sën yō nedo rağ ngaa rangah-yi vorot lo, og hil nid negga rağ hil vewen vewen, lob Anutu Nalu Yesu nikōk yō medo neripek hil ngaa nipaya pin ya, gehil nid vesa nerağ. ⁸Bë hil nanër nabë, “Sağ su nehevong ngaa nipaya rë”, og sagak hil ngo netetuhin ayod meris mu, gağ ğağek anon su nare loğ hil ayod rë. ⁹Rëk mu nabë hil nanër hil ngaa nipaya rangah vu yi, og rëk kevoh na, in yi og su nepekwë yi rë. Gağ yō nevong ngaa yohvu mu, om rëk jevu ngaa nipaya pin na in hil ayod gehil medo nid vesa. ¹⁰Anutu nër bë hil pin nehevong ngaa nipaya, om nabë hil nanër nabë, “Sağ su nehevong ngaa

nipaya ti rë”, og sënë nebë hil nemehoo yi gägek, benanër yah raḵ yi bë yi mehö gägek tetuhinsën, log yi gägek su neggëp loḵ hil ayod rë.

Kerisi Og Hil Mehö Sën Nelöḵ Vu Hil

2 ¹Naluḡ lo, sa nekevu kapiya sënë yök vu ham in bë ham su gwevongŋŋaa nipaya. Gaḵ nabë mehöti gevongŋŋaa nipaya, og hil Mehö sën nelöḵ vu hil menenër hil gägek lo nedo ving Ama. Mehö sënë og yik mehö yohvu Yesu Kerisi. ²Yö diik loḵ yah hil bed in bë kevoh hil ŋŋaa nipaya na beḡägek ahë yes jaḵ in hil. Rëḵ mu su nevongŋ huk sagi in bë doḵ vu hil mu rë, gaḵ nevongŋ in bë doḵ vu alam pin sën denedo yoh vu dob pin agi geving. ³Nabë hil nesepa loḵ Anutu yi horek, og hil ajaḵ ni nabë hil naraḵ yi ni. ⁴Log nabë mehöti nanër nabë neraḵ Anutu ni, rëḵ mu su nesepa loḵ Anutu yi horek rë, og yi mehö gägek kuungsën ala, gaḵ gägek anon su neggëp loḵ ayo rë. ⁵⁻⁶Gaḵ nabë mehöti sepa doḵ Anutu yi gägek, og saga tato bë nesepa loḵ Anutu yi aggata ahëvingsën-yi yönon rot. Log mehöti sën nenër bë luho Anutu denedo revuh ti lo, og gevongŋŋaa pin noh vu sën Kerisi nevongŋ lo, in mëm hil ajaḵ ni nabë luho Anutu denedo loḵ ti yönon.

Mehöti Sën Ahë Neving Ari Lo Lo, Og Nedo Raḵ Rangah

⁷O sa mehö lo-e! Horek sën sa kevu vu ham-ë, og su mewis rë, gaḵ yik horek muḡeng sën yik yök vu ham wirek lo. Horek muḡeng saga yik gägek sën ham ngo nyëdahis lo. ⁸Rëḵ horek sën sa kevu vu ham agi, og horek mewis. In Kerisi yam nedo dob, lob sepa loḵ horek sagi beneggëp rangah, log ham nesepa loḵ ving. In malakenu maya geheng ya, berangah anon to dob beneggëp ya. ⁹Log nabë mehöti nanër nabë nedo raḵ rangah, rëḵ mu nelë ari paya, og mehö saga yö nahën nesepa loḵ ŋŋaa malakenu-yi. ¹⁰Gaḵ mehöti sën ahë neving ari lo, og nedo raḵ rangah, om ŋŋaa ti su rëḵ gevongŋ mebës rë. ¹¹Gaḵ mehöti sën nelë ari paya lo, og nesepa loḵ ŋŋaa malakenu-yi. Nesepa loḵ ŋŋaa malakenu-yi om neketul loḵ in aggata niröp, in ŋŋaa malakenu-yi sënë neggërin mala.

¹² in Anutu kevoh ham ŋŋaa nipaya ya raḵ Kerisi arë.

¹³ Log ham alam hib, sa nekevu gägek sënë yök vu ham,
in ham raḵ Mehö sën yö nedo wirek rot menedo gwëbeng agi
degwa ni.

Gesa nekevu gägek sagi yök vu ham hur maḡëm
sën ham kwesuu Mehö Nipaya Satan ggovek ya lo ving.

¹⁴ Sa nekevu gägek yök vu ham hurmahen
in ham raḵ Amamin vu yaḡek ni nivesa.

Log sa nekevu gägek sagi yök vu ham alam hib
in ham raḵ Mehö sën yö nedo vu wirek rot benedo gwëbeng agi
degwa ni.

Gesa nekevu gagek senë yök vu ham hur magëm,
 in ham hur magëm los nimin wëëk,
 lob Anutu yi gagek neggëp loḵ ham ayomin
 beham kwesuu Mehö Nipaya Satan ggovek ya.

Hil Su Ahëd Geving Aggata-dob-yi

¹⁵Ham su ahëmin geving aggata-dob-yi los ngaa-dob-yi pin. Nabë mehöti ahë geving aggata-dob-yi rot, og su yoh vu bë ahë geving Ama vu yagek rë. ¹⁶In hil arak ngaa-dob-yi pin sagi ni bë ngaa sën hil navid nevonḡin lo, gengaa sën hil malad anon in lo, gengaa sën hil nehako hil rak in lo, og su yam vu hil Amad Anutu rë. Gaḵ yô verup rak aggata-dob-yi. ¹⁷Rëḵ mu ngaa-dob-yi los ngaa sën hil malad anon in vu dob lo pin, og rëḵ mala nama na. Gaḵ mehöti bë sepa doḵ Anutu aye, og rëḵ medo degwata.

Alam Sën Denelë Yesu Paya Lo Deverup

¹⁸Naluḡ lo-e! Gwëbeng og hil verup loḵ buk sën dob vonḡin govek na lo. Wirek og ham ngo gagek bë mehö sën nevonḡin bë dahun Kerisi na lo rëḵ berup. Lob gwëbeng og alam ngahi nebë saga detöḵ yam rangah ggovek ya, om hil arak ni bë buk dus rak bevonḡin govek na. ¹⁹Alam sën bë dedahun Kerisi na aga, og yik sir Kerisi-yi-alam nebë hil. Rëḵ dekehe sir vër in hil, om su hil alam sir niröp rë. Gaḵ bë hil alam sir niröp, og rëḵ demedo geving hil rot. Rëḵ ma gedevuu hil ya, om hil arak ni niröp bë su hil alam sir rë. ²⁰Rëḵ mu Kerisi vonḡ Anon Vabuung yök nedo ving ham, om ham pin rak gagek anon ni. ²¹Sa su nekevu gagek sagi yök vu ham in bë maḵ ham duḡin gagek anon rë! Gaḵ sa nekevu in ham rak gagek anon ni vorot geham rak ni bë gagek anon og su nenër gagek kuungsën ti verup loḵ rë. ²²Mehö re gagek kuungsën ala? Gaḵ yik mehö sën nelah Kerisi vun bë su yi mehö sën Anutu ggooḡin rak in bë geḵo hil nah rë lo. Mehö saga og yik mehö sën nevonḡ in bë dahun Kerisi na lo, lob neruu demi vu Nalu gevu Ama ving. ²³Mehöti bë geruu demi vu Nalu, og su Ama yi alam yi rë. Gaḵ mehöti sën nenër rangah bë nevonḡ ving Nalu lo, og Ama yi alam yi ving.

Anon Vabuung Netahu Hil Loḵ Gagek Anon

²⁴Gagek sën ham ngo wirek muḡin lo, og ham ngo najom ahon. Nabë ham najom gagek sën ham ngo muḡin lo ahon, og ham los Ama lu Nalu rëḵ medo jevuh ti. ²⁵Lob nër gagek vu hil benare vorot bë rëḵ gevonḡ behil medo malad-tumsën degwata los degwata. ²⁶Sa nekevu gagek senë yök vu ham in bë nanër alam sën vonḡin degekuung in ham aga tato vu ham. ²⁷Rëḵ mu ham ḵo Anon Vabuung vu Kerisi ggovek ya benahën nedo ving ham. Om ham su nesero mehö ngwë in bë tateḵin gagek vu ham rë,

gak Anon Vabuung yö netatekin ngaa pin vu ham. Lob Anon Vabuung yi gagek og gagek anon, gak su gagek kuungsën rë, om ham najom gagek sën netatekin vu ham lo ahon begwa jak Kerisi.

²⁸Yönon, nalu lo! Ham ngo gwa jak yi rot, lok mëm vu tamusën sën natök nom rangah lo, og hil bare nid wëek los kwad vesa dok buk saga, gak hil su agöneng in yi. ²⁹Ham neraç Kerisi ni bë yi mehö yohvu, om ham jak sënë ni geving nabë alam sën denevong ngaa yohvu lo, og detu Anutu nalu.

Gwëbeng Hil Atu Anutu Nalu Lo

3 ¹Alam-e! Ham kwamin bo nabë hil Amad Anutu ahë neving hil pangsën rot, om sën nenër hil bë nalu hil lob sagak yönon-Anutu nalu hil. Rëç alam sën denesepa lok aggata-dob-yi lo, og su deraç sënë degwa ni rë, in sir duçin Anutu.

²Sa mehö lo-e! Gwëbeng sënë hil atu Anutu nalu, rëç hil duçin sën hil rëç nid nabë lo, in Anutu su tatekin meneggëp rangah rë. Gak hil arak ni bë tamusën, sën Yesu rëç natök nom rangah gökin lo, og hil rëç nid nabë yi, in hil rëç galë anon soçek. ³Log alam pin sën denevo kwaj in gagek sagi bë anon jak lo, og yö denëgin sir bedenevongin bë denatu mehönon nijvesa rot nabë sën mehö nivesa Kerisi. ⁴Gak alam pin sën denevong ngaa nipaya lo, og denekeyëh horek, in ngaa nipaya og yik ngaa sën nekeyëh Anutu yi horek. ⁵Lob ham rak ni bë Yesu og ngaa nipaya ti su neggëp vu yi rë, gak tok yam rangah in bë geko hil ngaa nipaya nyëvewen vër in hil. ⁶Mehöti sën negga rak yi lo, og su nesepa lok ngaa nipaya rë. Gak mehöti sën nesepa lok ngaa nipaya yi aggata lo, og hil narak ni bë su nelë Kerisi rë, gesu neraç Kerisi ni rë.

⁷Oo sa hur mahen lo! Ham gweçin ham in mehöti rëç tetuhin ham. Mehö sën yö nevong ngaa yohvu lo, og yi mehö yohvu nebë sën mehö yohvu Kerisi. ⁸Satan ko ngaa nipaya rak nyëmuginsën bemedo nesepa lok, om mehöti sën nesepa lok ngaa nipaya lo, og Satan yi alam yi. Rëç mu Anutu Nalu tok yam rangah in bë basap Satan gekevoh yi huk na. ⁹Mehö sën tu Anutu nalu lo, og su nesepa lok ngaa nipaya rë. Gak Anutu vong beni nebë yi, om su yoh vu bë sepa dok ngaa nipaya rë, in tu Anutu nalu. ¹⁰Nabë hil nehevongin bë ajak Anutu nalu lo nij, gajak Satan nalu lo nij, og hil ajak nij nabë sënë: Alam sën su denevong ngaa nivesa rë lo, og su Anutu-yi-alam sir rë. Log alam sën su ahëj neving arij lo rë lo, og su Anutu nalu sir ving rë.

Aggata Soçek Sën Hil Ahëd Geving Arid Lo Lo Nebë Sënë

¹¹Ham ngo gagek sënë vu nyëdahis beyam bë: Hil ahëd geving hil vewen vewen. ¹²Hil su gevong ngaa nabë Kain. In Satan yi mehö yi, om sën sis ari mediik. Sis ari mediik degwa rak va? Degwa nebë yi mehö nesepa lok aggata nipaya, gari nesepa lok aggata niröpsën-yi.

¹³ Arig lo! Nabë alam sën denesepa loḵ aggata-dob-yi lo sënë degelë ham paya, og ham su gwelëk mejanḡa nemamin in nḡaa saga. ¹⁴ Hil ahëd neving arid lo, om hil araḵ ni raḵ sënë bē: Hil hevuu sën hil nadiiḵ na verōḵ yi lo ya, gatōḵ yam sën hil medo malad-tumsën degwata lo. Gaḵ mehōti sën su ahë neving ari lo rē lo, og yō nahën nedo loḵ diiḵsën. ¹⁵ Mehōti sën nelë ari paya lo, og sënë nipaya böpata rot nebë sën sis yi mediḵ. Lob ham raḵ ni bē alam sën denesis mehōnon medenediḵ lo, og mala-tumsën sën gevonḡ behil medo degwata los degwata lo su neggëp vu sir rē. ¹⁶ Yesu diiḵ loḵ yah hil bed in bē doḵ vu hil, lob hil araḵ ahëvingsën anon degwa ni raḵ sënë. Om yiḵ hil geving. Hil dahun hil badōḵ vu arid lo nabë saga, genabë hil nadiiḵ og yiḵ ggovek. ¹⁷ Rëḵ mu nabë mehōti yi nḡaa dob sënë neggëp, lob lë gari ti raḵ vu in nḡaa ti, rëḵ ruu demi vu ari sënë, gesu loḵ vu yi raḵ yi nḡaa rē, loḵ nenër bē ahë neving Anutu in va?

¹⁸ Oo sa hurmahen lo, hil su ahëd geving arid lo jaḵ vengwëḡsën los avid meris mu, gaḵ hil ahëd geving sir yōnon beḡevonḡ huk madoḵ vu sir.

Alam Sën Denevonḡ Ving Anutu Lo, Og Su Deneggōneng In Mala Rē

¹⁹ Nabë hil ḡevonḡ nabë saga, og rëḵ tato vu hil nabë: Hil nesepa loḵ ḡaḡek anon yōnon, genabë hil ayod neggëp nivesa, om hil su rëḵ aḡōneng in Anutu mala rē. ²⁰ Gaḵ nabë hil ayod nanër hil nabë hil nehevōḡ nḡaa nipaya, og hil kwad bo nabë Anutu og böpata kesuu hil ayod meneraḵ nḡaa pin ni los degwa.

²¹ Sa mehō lo-e! Nabë hil ayod su nanër hil nabë hil nehevōḡ nḡaa nipaya rē, og hil su aḡōneng in Anutu mala. ²² Log nḡaa sën hil neḵetaḡ in vu yi lo, og nevōḡ vu hil. In hil nesepa loḵ yi horek behil nehevōḡ nḡaa yoh vu sën ahë neving lo.

²³ Log yi horek nebë sënë: Hil ḡevonḡ geving Nalu arë nabë yiḵ yi Yesu Kerisi, gehil ahëd geving hil vewen vewen nabë sën nër vu hil vorot lo. ²⁴ Nabë mehōti sepa doḵ Anutu yi horek, og luho Anutu detu timu ḡAnutu nedo loḵ yi. Lob Anon Vabuung sën Anutu vonḡ vu hil lo tato vu hil behil naraḵ ni bē Anutu nedo loḵ hil ayod.

Anutu Yi Anon Vabuung Ga, Memō Lo

4 ¹ Oo sa mehō lo! Alam-ḡaḡek-kuungsën ḡahiseḵë denedo yoh vu nyëḡ vu dob. Nebë saga, om ham su gwevonḡ geving mehōnon pin sën denenër bē Anon Vabuung nedo loḵ sir lo. Gaḵ ham seggi nḡaa sën nedo loḵ sir lo pin mejaḵ ni rē nabë Anon Vabuung sën neyam vu Anutu lo yōnon ma ma. ² Log ham yoh vu bē jaḵ ni nabë Anutu yi Anon Vabuung nedo loḵ mehōti og rëḵ nabë sënë: Alam pin sën denanër nabë Yesu Kerisi tu mehōnon raḵ meyam dob lo og Anutu yi Anon Vabuung nedo loḵ sir. ³ Gaḵ alam pin sën su denenër nebë agi rē lo, og nḡaa sën

nedo loḵ sir lo su yam vu Anutu rë. Gaḵ yam vu mehö sën vonḡin bë dahun Kerisi na, beham ngo bengö wirek bë rëḵ nam lo. Lob gwëbeng yam ggovek ya benedo dob.

⁴Oo sa hurmahlen lo! Anutu yi ngaa ham, lob ham dahun alam-gägek-kuungsën lo ggovek ya. In Anon Vabuung sën nedo loḵ ham aga kesuu Memö Nipaya sën nedo loḵ alam vu dob agi. ⁵Alam-gägek-kuungsën sën aga, og denesepa loḵ aggata-dob-yi. Lob hir gägek pin og yik denenër ngaa-dob-yi mu, lob alam sën denesepa loḵ aggata-dob-yi lo denebë nengaj vu ayej. ⁶Gaḵ hileḵ Anutu yi ngaa hil. Om mehöti sën nerak Anutu ni lo, og nebë nenga vu hil gägek. Gaḵ mehöti sën su Anutu yi mehö yi rë lo, og su nebë nenga vu hil ayed rë. Yik hil ngo rëḵ ajak Anon Vubuung gägek-anon-yi ni, gajak memö gägek-kuungsën-yi ni jak ngaa nabë sënë.

Ahëvingsën Degwa Soḡek Anutu

⁷Oo sa mehö lo! Hil pasang ahëd geving hil vewen vewen. In sën hil ahëd geving alam lo, og degwa vu Anutu. Om mehö sën nesepa loḵ aggata-ahëvingsën-yi lo, og Anutu nalu yi beneraḵ Anutu ni yönon. ⁸Gaḵ mehö sën su ahë neving ari lo rë lo, og yi duḡin Anutu, in ahëvingsën degwaseḵë Anutu. ⁹Anutu yik nalu perurek timu nedo, lob vonḡ loḵ yam dob in bë doḵ vu hil behil medo malad-tumsën jak yi. Lob sënë tato vu hil bë Anutu ahë neving hil. ¹⁰Ahëvingsën degwa nebë sënë: Anutu su ahë neving hil in hil ahëd neving yi muḡin rë. Gaḵ yö ahë neving hil muḡin bevong Nalu loḵ yam dob in bë natu seriveng doḵ nah hil bed, bekevoh hil ngaa nipaya na.

¹¹Oo sa mehö lo! Ngaa sënë tato vu hil bë Anutu ahë neving hil pangsën rot, om yik hil gevonḡ nabë saga behil ngo ahëd geving hil vewen vewen. ¹²Mehöti su mala rak Anutu rë. Rëḵ mu nabë hil ahëd geving hil vewen vewen, og Anutu rëḵ medo doḵ hil ayod, lob mëm hil rëḵ ahëd geving hil niröp rot nabë sën Anutu ahë neving hil lo. ¹³Vo yö yi Anon Vabuung vu hil, lob hil narak ni rak sënë bë hil los Anutu atu timu, genedo loḵ hil ayod. ¹⁴He halë rak malamin bë Ama vonḡ Nalu loḵ yam dob in bë geḵo alam vu dob nah vu yi, om sën he nanër gägek sënë rangah. ¹⁵Nabë mehöti nanër rangah nabë Yesu sënëḵ Anutu Nalu, og Anutu nedo loḵ mehö saga, geluho mehö saga detu timu.

¹⁶Lob hil arak ni benehevong ving bë Anutu ahë neving hil. Ahëvingsën degwaseḵë Anutu, log mehöti sën nesepa loḵ aggata-ahëvingsën-yi lo, og luho Anutu detu timu gAnutu nedo loḵ ayo. ¹⁷Nabë hil medo dob sënë begevong ngaa nabë Kerisi, og hil arak ni bë hil nesepa loḵ aggata-ahëvingsën-yi niröp rot. Om hil su rëḵ agöneng in buk böpata sën nyëvewen-yi lo rë. ¹⁸Nabë hil ahëd geving yönon, og hil su rëḵ agöneng rë. Yönon, nabë hil sepa doḵ aggata-ahëvingsën-yi niröp rot, og saga rëḵ juuk ggönengsën na. Ggönengsën

degwa nebë mehönön kwaj nevo bë rëk denatök jak hir ngaa nipaya nyëwewen. Om nabë mehöti nahën neggöneng, og hil narak ni bë su nesepa loḵ aggata-ahëvingsën-yi niröp rot rë. ¹⁹Ahëvingsën neggëp vu hil in degwa rak sën Anutu yö ahë ving hil muḡin lo. ²⁰Nabë mehöti nanër nabë ahë neving Anutu, loḵ hil halë bë nelë ari paya, og mehö saga yö kuung rak. In lë ari rak mala rëk su ahë neving yi rë, om su yoh vu bë rëk ahë geving Anutu sën su lë rak mala rë lo. ²¹In hil haḵo horek sënë vu Kerisi bë: Mehöti sën ahë neving Anutu lo, og yik ahë geving ari lo geving nabë saga.

Alam Sën Denevong Ving Lo, Og Denedahun Ngaa-dob-yi Ya

5 ¹Alam sën denevong ving Yesu bë yi mehö sën Anutu ggooi rak in bë geḵo hil nah lo, og alam saga detu Anutu nalu. Log alam sën ahëj neving Anutu lo, og ahëj neving nalu lo pin ving. ²Om nabë hil ahëd geving Anutu besepa doḵ yi horek, og saga tato vu hil bë hil ahëd neving Anutu nalu lo ving. ³Bë hil ahëd neving Anutu, og hil rëk sepa doḵ yi horek, lob yi horek su rëk maggin vu hil rë. ⁴In alam pin sën denetu Anutu nalu lo, og denevuu ngaa-dob-yi ya. Log sën yik hil ayod neya timu vu Kerisi lo og vonḡ behil hevuu ngaa-dob-yi ya gehil nare nidwëëk. ⁵Mehö nebë tena nevuu aggata-dob-yi ya genare niwëëk-a? Gaḵ yik mehö sën nevong ving Yesu bë Anutu Nalu lo.

Anutu Nër Nalu Yi Ġaḡek Raḡah

⁶Yik Yesu Kerisi sënë sën yam los bël-ripeksën-yi lo, geyam in bë keseh köḵ jak kelepeḵo*. Su bël mu tateḵin yi raḡah rë, gaḵ bël los köḵ detateḵin yi raḡah loḵ ti. Lob Anon Vabuung tateḵin ġaḡek rak Kerisi ving, in Anon Vabuung og mehö ġaḡek-anon-yi. ⁷Sir löö sënë denetateḵin yi raḡah: ⁸Anon Vabuung, gebël, geḵök, lob yik lööhoho denenër ġaḡek neggëp ti. ⁹Hil nehangö ġaḡek sën mehönön denenër vu hil lo benehevong ving, rëk mu ġaḡek sën Anutu nenër lo kesuu ġaḡek sën mehönön denenër agi. Lob ġaḡek sën Anutu nër agi, og yik ġaḡek sën netateḵin Nalu raḡah lo. ¹⁰Mehöti sën ayo neya timu vu Anutu Nalu lo, og rak ni loḵ ayo bë ġaḡek sën Anutu nër agi og yönön. Gaḵ mehöti sën su ayo neya timu vu Anutu rë lo, og sagaḵ nenër bë Anutu mehö ġaḡek-kuungsën. In su nevong ving Anutu Nalu yi ġaḡek anon sën Anutu yö tateḵin raḡah lo rë. ¹¹Ġaḡek anon sën Anutu nër agi nebë: Anutu vo mala-tumsën degwata los degwata vu hil, degwa rak Nalu. ¹²Mehöti sën yö negga rak Anutu Nalu rot lo, og mala-tumsën neggëp vu yi. Gaḵ mehöti sën nedo ading in Anutu Nalu lo, og mala-tumsën sënë su neggëp vu yi rë.

Hil Ajaḵ Ni Nabë Hil Rëk Medo Malad-tumsën Degwata

¹³Sa ḵevu ġaḡek sënë yök vu ham, in bë ham sën ham nevong ving Anutu Nalu arë lo jak ni borot nabë ham ḵo mala-tumsën degwata los

degwata yök vu ham ggovek ya. ¹⁴Bë hil ketağ ngaa ti vu Anutu, og hil su agöneng in yi, in hil narak ni vorot bë: Nabë hil ketağ noh vu sën kwa nevo lo, og rëk gebë nenga vu hil. ¹⁵Yönon, hil arak ni vorot bë nebë nenga vu hil in ngaa pin sën hil neketag vu yi in lo, om hil ajak sënë ni geving nabë vong ngaa sën hil ketağ in vu yi lo vu hil ggovek ya. ¹⁶Bë mehöti lë gari vong ngaa nipaya ti, rëk mu ngaa nipaya sënë su yoh vu bë gevonğ bari sënë na mala nama doğ Nyëğ Nipaya rë, og najom jak vu Anutu in yi, lob Anutu rëk gevonğ bemedo mala-tumsën. Yik senër alam sën denevonğ ngaa nipaya sën su yoh vu bë gevonğ bemalaj nama doğ Nyëğ Nipaya rë lo. Gağ ngaa nipaya sën rëk gevonğ bemehönon malaj nama doğ Nyëğ Nipaya lo, og sa su nër rak saga bë ham kwetağ in rë. ¹⁷Ngaa pin sën su neyoh vu rë lo, og sagak ngaa nipaya pin. Rëk ngaa nipaya vahi og su nevonğ bemehönon malaj nema verök yi loğ Nyëğ Nipaya rë. ¹⁸Hil arak ni bë alam pin sën detu Anutu nalu lo, og su denesepa loğ ngaa nipaya rë. Gağ Anutu Nalu nemalain sir nivesa, om Satan su yoh vu bë gebë nema jak sir rë. ¹⁹Hil narak ni bë hil atu Anutu nalu lo, gağ Satan tu mehönon sën denesepa loğ aggata-dob-yi lo pin alaj. ²⁰Hil arak ni bë Anutu Nalu yam ggovek ya, lob tatekin hil kwad in bë hil ajak Anutu soğek ni rot. Lob hil los Anutu soğek atu timu, in hil los Nalu Yesu Kerisi atu timu ggovek ya. In Nalu og yik yi Anutu soğek, bemala-tumsën degwa neggëp degwata los degwata vu yi.

²¹Oo sa hurmahen lo! Ham gweğın ham vu anutu-kuungsën.